

31-7-90

En engrazieivla regurdientscha da

Lucia Deragisch-Hitz, Sedrun

N.V. Venderdis, ils 15 da zercladur 1990, han parents, enconuschents ed in grond pievel assistiu al survetsch divin funeral ed accumpignau alla fossa sin santeri da s. Vigeli la defuncta Lucia Deragisch-Hitz. En la val Tujetsch eisi adina puspei d'admirar che tons e tons prendan peda e muossan la duida reverenza viers nos morts cun prender aschi stediamein part tier las sepulturas a quels che han dau adia al mund terrester per serender ella perpetnadad.

La defuncta Lucia Deragisch nata Hitz ei naschida ils 25 da decembre 1917 sco feglia digl enconuschent cava-crappa Gion Antoni Hitz e Maria Barla nata Pally. En campignia da 14 fargliuns, famiglias ch'ins anflava dètg stedi da gliez temps, ei la defuncta car-schida si, ha absolvii las scolas dil vitg e gudiu ina buna educaziun e preparaziun per la veta. Finiu las scolas eis ella serendida a Turitg tier sia sora veglia e luvrau en l'enconuschenta firma dils frars Deflorin. Suenter zacons onns ha la defuncta surpriu ina plazza sco cu-schiniera tier il pilot Ackermann a Turitg.

Da gliez temps haveva siu bab Gion Antoni la filiala dil consum Coop a Rueras. Damai ch'el basignava ina vendidra ei sia feglia Lucia veginida a casa ed ha gidau plirs onns siu bab el con-sum. Quei agid ei staus fetg d'engrau al



bab Gion Antoni che era in passiunau cavacristallas.

Ils 13 da matg 1943 marida Lucia cul stuccadur Placi Deragisch da Gonda a Sedrun. Il di da nozzas ei la spusa, pia la defuncta Lucia, veginida ord Rueras en crotscha cul pot da Rueras sco vitturin. Lu er'ei moda da far nozzas en vestgiu ner e tschupi alv senza vel e la defuncta seigi stada la davosa spusa en tal ve-stgiu. Co ils temps semidan?

Ord la lètg da Placi Manuel sco el vegin numnaus e da Lucia han quater

affons astgau mirar la glisch dil mund. Las treis buobas sco era il fegl ein stai il plascher pils geniturs e la trapassada ha segidau pruamein nua ch'ella ha saviu e pudiu. Grond quitau e plascher ha ella giu cun siu emprem beadi ed ella sele-grava era dallas visetas dils auters da lunsch e da maneivel. Siu pli grond, plascher ed ideal era la lavur ed oravontut il cuschinari ella Tgèsa Strem ei stau siu preferiu pensum e tschaffen.

Siu hoby e plascher principal ei adina il curtin cun bia flurs staus. Uras ed uras ha la defuncta passentau en curtin ni jert cun tgirar quel e gie haver qui-tau dallas differentas sorts flurs. Cons e contas han admirau e ludau las bellezia flurs dalla Lucia. Ludar ed apprezziar la natira sin quella moda ei senza dubi en-zatgei niebel e da far menzien.

Cun strusch 70 onns ha ina maligna malsogna surpriu la defuncta. Suenter esser serestabilida empauet eis ella den-ton veginida attaccada alla fin digl onn passau pli ferm dalla malsogna nuncu-rabla e duront quasi siat meins ha ella endirau cun pazienza, cardientscha e speranza en la resignaziun da Diu. Stuer semudergiar ed endirar aschi ditg ei senza dubi stau ina greva crusch ton per la defuncta sco era per ils ses da casa. Suenter ina tala via dalla crusch vegin il bien Diu a remunerar la de-functa Lucia en l'auter mund e dar ad ella il rauas e la glisch perpetna.